

TEZAUUR LITURGIC

11 APRILIE

ACATISTUL

SF. CUVIOS

IACOB

DE LA

JELEZNOBOROVSK



MOSCOVA, 2000



Акафист

святому преподобному

Иакову Железоборовскому

Кондак 1

Избранный чудотворче, и предивный угодниче Христов Иакове, источаяй неоскудно исцеления приходящих к тебе с верою, с любовию похвальная восписуем ти, преподобне; ты же, яко имеяй дерзновение ко Святей Троице, от всяких нас бед твоими молитвами избави, и вся полезная испроси зовущим ти: радуйся, Иакове, богомудре отче наш.

Икос 1

Ангел земный и небесный человек явился еси, преподобне отче наш Иакове; аще бо и человек естеством быв, но яко безплотен на земли пожил еси, всякое житейское отложив попечение, да Единому благоугодиши Богу; темже тя, яко угодника Христова и приснаго собеседника Ангелов любовию почитающе, похвальными песнями ублажаем сие:

Радуйся, Костромских пределов славное прозябение.

Радуйся, отца благочестиваго отрасль;

Радуйся, матери благоговейной плод.

Радуйся, Христа Бога от юности паче всего возлюбивый;

Радуйся, стезем Того последовати всеусердно возжелевый

радуйся, вся красная мира сего во уметы вменивый;

радуйся, заповедь Евангелия, еже ни о чесом же от сущих в мире пещися, с любовию исполнивый.

Радуйся, велиим воздержанием измлада тело твое изнуриый;

радуйся, плоть твою духови покоривый.

Радуйся, благий рабе и верный, данный тебе талант сугубо возрастивый;

радуйся, слуго Господень, преблагую волю Владыки своего сотворивый.

Радуйся, от утра до вечера твоея жизни в винограде Христове потрудивыйся.

Радуйся, Иакове, богомудре отче наш.

Кондак 2

Видя суету земных попечений, мирскаго мятежа избегнути потщался еси, богомудре Иакове, возлюбив же тишину и безмолвие, в пустыни вселитися восхотел еси, да един Единому Богу работаеши, присно воспевая: Аллилуиа.

Икос 2

Разум недоразуменный и мамы, како восхвалити по достоянию подвиги и труды твоя, преподобне отче Иакове; сего ради молим тя, моли, угодниче Христов, подати нам свыше разум, да возможем по долгу воспети богоугодное житие твое; благоговейне совершающе святую память твою, вопием ти сице:

радуйся, яко блага земная еще юн сый, презрел еси.

Радуйся, яко вся имения твоя, от родителей оставшаяся, нищим раздал еси;

радуйся, яко ни к чему же от сущих в мире сердцем твоим прилепился еси.

Радуйся, яко Духом Святым от сует земных возван был еси, во еже работати Господеви;

радуйся, яко в воинство слуг Христовых
вписатися преискренне восхотел еси.

Радуйся, яко куплями житейскими не
обязался еси, да Небесному Воеводе угоден
будеши;

радуйся, яко иноческое житие зело возлюбил
еси.

Радуйся, яко богомудраго наставника на путь
спасения взыскал еси;

радуйся, яко преподобному и богоносному
Сергию всеусердно в послушание себе предал
еси.

Радуйся, яко к богособранному стаду
духовных чад его причтен был еси;

радуйся, яко благий ярем иноческаго жития
от преподобных рук его с радостию восприял
еси.

Радуйся, яко труды, скорби и тесноты
иноческаго жития ради Господа Иисуса понесл
еси до конца.

Радуйся, Иакове, богомудре отче наш.

Кондак 3

Сила Божественная любви, еюже измлада исполнено бысть сердце твое, толико укрепи ты в подвизах, яко возложь руку твою на рало, никакоже вспять обратился еси, радостно воспевая Богу: Аллилуиа.

Икос 3

Зряще равноангельное твое житие, како кто возможет поведати глубину твоего смирения, высоту самоотречения и широту твоея любви, яже к Богу; по силе же нашей, хвалебными песнями ублажающе, зовем ти:

радуйся, мужу желаний Господних.

Радуйся, Царства Небеснаго искренний искателю;

радуйся, столпе благочестия непоколебимый.

Радуйся, верный исполнителю Уставов Святыя Церкви;

радуйся, многосуетнаго мира любви ради Божия отрекийся.

Радуйся, благое иго Христово на себе восприявый;

радуйся, вечное спасение души твоея паче всего взыскавый.

Радуйся, в богомыслии и памятовании смерти всю жизнь препроводивый;

радуйся, горняя мудрствовати, а не земная, от раннего возраста научивыйся.

Радуйся, водительству Небесных Мудрости всего себе вручивый;

радуйся, всякое плотское мудрование далече от себе отринувый.

Радуйся, не имевый зде пребывающаго града, но грядущаго взыскавый.

Радуйся, Иакове, богомудре отче наш.

Кондак 4

Бурею уныния и туги сердечныя, яже воздвиже на тя ненавидяй всякаго добра диавол, никакоже сокрушити возможе крепкаго твоего произволения, еже работати Господеви, ни воспретити от благаго твоего начинания; надеждею бо на помощь укрепився, Спасающему тя от малодушия и от бури, взывал еси Богу: Аллилуиа.

Икос 4

Слышав во Евангелии глас Господа, глаголющий: иже хочет по мне ити, да отвержется себе, и возмет крест свой и по мне грядет, ни единоеже исполнил еси плотских похотений твоих, но всеусердно взял на рамена своя крест свой, последовал еси во всем Господу Иисусу Христу; сего ради достойно есть величати тя сице:

радуйся, яко в законе Господни день и ночь поучался еси.

Радуйся, яко заповеди Божии поставил еси аки светильник ногама твоима, и свет стезем твоим;

радуйся, яко оправдания Господня безпорочна сохранил еси.

Радуйся, яко Пресвятей Троице всеусердно послужил еси;

радуйся, яко любовью твоею к Богу Отцу приближался еси.

Радуйся, яко послушанием твоим Богу Сыну последовал еси;

радуйся, яко чистотою твоею Богу Духу Святому во обитель себе уготовал еси.

Радуйся, яко утвердил еси мышцы твоя на труды иноческаго послушания;

радуйся, яко связал еси руце твоя для всякаго дела, Богу неугоднаго.

Радуйся, яко нозе твои скоры соделал еси к течению на всякия добродетели;

радуйся, яко стопы твоя уклонил еси от шествия по пути грешных.

Радуйся, яко уста твоя отверзал еси точию на славословие Божие и молитву.

Радуйся, Иакове, богомудре отче наш.

Кондак 5

Боготечная звезда явился еси, преподобне Иакове, руководящая многих ко спасительному пути; постом бо, молитвами, и всенощными бдении очистив душу твою, возшел еси на высоту добродетелей, воспевая Богу: Аллилуиа.

Икос 5

Видев, смиренномудре отче Иакове, многих во обители преподобнаго Сергия безмолвию прилежащих, потщался еси подражатель сих быти, и устом твоим положил еси хранение, в

молчании выну пребывая; удивляющесе убо
таковому подвигу твоему, ублажаем тя сице:

радуйся, житию богоноснаго наставника
твоего Сергия поревновавый.

Радуйся, в посте и воздержании древних
великих отцев подражавый;

радуйся, в бдениих неутомима себе явивый.

Радуйся, дни и ноци в молитвах
препроводивый;

радуйся, всякий вид добродетелей исправить
вожделевый.

Радуйся, образ нестяжания всем бывый;

радуйся, вольную нищету возлюбивый.

Радуйся, тою богатство вечное стяжавый;

радуйся, чистоту душевную, вкупе и
телесную сохранивый.

Радуйся, подвиг молчания с любовию
понесый;

радуйся, незлобием и братолюбием душу
твою украсивый.

Радуйся, всякое телесное озлобление с
радостью претерпевый.

Радуйся, Иакове, богомудре отче наш.

Кондак 6

Проповедник немолчный истиннаго смирения всем был еси, блаженне Иакове, и с сокрушенным сердцем непрестанно взывал еси Богу: Аллилуиа.

Икос 6

Возсиял еси, яко звезда пресветлая посреде богособраннаго сонма иноков во обители великаго во отцех Сергия, светолепным житием твоим, Преподобне Иакове; труды бо к трудам прилагал еси, нощи провождая во бдениих и коленопреклонениих, на правило же церковное и на всякое обительное послушание первый являясь. Воспоминающе сия, любовью вопием ти сице:

радуйся, яко на камени Православныя веры себе утвердил еси.

Радуйся, яко страх Божий в сердце твоём от юности насадил еси;

радуйся, яко любовью крепко, аки смерть, ко Христу Богу прилепился еси.

Радуйся, яко надежду во всем на Единого Бога возложил еси;

радуйся, яко гордость житейскую далече от себе отринул еси.

Радуйся, яко воздержанием страсти плотския умертвил еси;

радуйся, яко от мира дольняго в Горний мир ум и сердце твое вперил еси.

Радуйся, яко вместо тленных благ нетленная и вечная возлюбил еси;

радуйся, яко всяку Евангельскую добродетель на сердце твоём изобразил еси.

Радуйся, яко всеми благими делы Господеви всеусердно послужил еси;

радуйся, яко в нощи бдел еси, пребывая в молитвах и молениих к Богу.

Радуйся, яко во плоти сый, безплотных житию поревновал еси.

Радуйся, Иакове, богомудре отче наш.

Кондак 7

Хотя преискренне к вящим подвигом устремиться, умолил еси богомудраго наставника твоего Сергия отпустить тя в

пустыню на одинокое пребывание. Благословение убо прием, и молитву многу сотворив Живоначальной Троице, отшел, преподобне Иакове, в путь свой, Господу Богу со умилением взывая: Аллилуиа.

Икос 7

Велия радости исполнися сердце твое, достоблаженне Иакове, егда пришед в Железный Борок рекомый, обрел еси место, идеже сподобился еси видети пресветлое сияние; отонудуже уразумеv, яко благоугодно есть место сие Господеви, и Крест ту водрузив, малую келлию устроил еси; послежде и обитель твоими молитвами, поты же и труды, возградися, на спасение приходящих с тобою. Мы убо, духовная чада твоя, святую память твою совершающе, сия тебе любовью восписуем:

радуйся, удалитися в пустыню совершенного ради безмолвия вожделевый.

Радуйся, в сокровеннем от человек месте работати Господеви изволивый;

радуйся, яко пустыннолюбивая горлица уединенного обиталища взыскавый.

Радуйся, градов и населенных весей
удалившийся;

радуйся, славу и похвалу от человек
возненавидевый.

Радуйся, в пределах отеческаго града
Костромы вселиться восхотевый;

радуйся, весь Железоборовскую своим
пришествием просветивый.

Радуйся, сподобивыйся тамо Божественнаго
видения;

радуйся, помощью Божиею, твоими
молитвами и труды обитель устройвый.

Радуйся, лик иноков в ней собравый;

радуйся, пречестный храм во имя Великаго
во пророцех Крестителя Иоанна соорудивый.

Радуйся, добрый пастырю и благий
наставниче ищущим спасения.

Радуйся, Иакове, богомудре отче наш.

Кондак 8

Странен был еси всякаго мирскаго
пристрастия, приснопамятне отче наш Иакове;
память бо смертную во уме и сердце
непрестанно имел еси, и душевныма очима

Господа Славы, на Престоле Седящаго, выну созерцал еси, воспевая Ему: Аллилуиа.

Икос 8

Вся дни и нощи в трудех препроводил еси, Преподобне отче наш Иакове, образ был еси терпения и кротости; сего ради достоин явился еси почести вышняго звания, и наследовал еси Царствие Небесное, идеже водворяяся, поминай нас, похвальная вопиющих ти:

радуйся, яко бодренно и неусыпно стоял еси на страже души твоея.

Радуйся, яко положил еси хранение устом твоим, еже не глаголати тщеты, и всякия неправды;

радуйся, яко заградил еси ушеса твоя от празднословия душевреднаго.

Радуйся, яко слух твой изошрил еси точию на слышание песнопений Божественных;

радуйся, яко и в глубоцей старости обычных ти подвигов не оставил еси.

Радуйся, яко в ископании водных хранилищ сам, паче иных потрудился еси;

радуйся, яко братии твоей образ трудолюбия был еси.

Радуйся, яко мудрыми словесы, паче же благим житием твоим, на путь спасения наставил еси;

радуйся, яко и безмолвием твоим паче слова многих поучил еси.

Радуйся, яко многая чудеса, еще жив сый, сотворил еси;

радуйся, яко множество гладных людей во обители твоей пропитал еси.

Радуйся, яко николиже оскудети ей обещал еси.

Радуйся, Иакове, богомудре отче наш.

Кондак 9

Всякия собрал еси в души твоей плоды духовнаго делания, и сих ради честное обиталище Пресвятаго Духа был еси, во смирении сердца присно воспевая: Аллилуиа.

Икос 9

Витийствующий язык не может изрещи, коликия напасти и искушения претерпел еси, Богоблаженне Иакове, непрестанную имый

брань противу тьмы предстателя; обаче
помощию Божию, твоим же смирением и
умиленными ко Господу молитвами до конца
того низложил еси. Темже ты величаем сими:

радуйся, противу князя тьмы мужественно
ратоборствовавший.

Радуйся, мудростию твоего рассуждения
лестныя помыслы, от врага наносимыя,
изобличивый;

радуйся, бесовския страхования аки призрак
вменивший.

Радуйся, силою Крестною полчища демонская
далече от себе прогнавший;

радуйся, твоими молитвами, аки мечем, всю
силу вражю поразивый.

Радуйся, будущая предведети благодать
приемый;

радуйся, прозираяй будущая, аки настоящая.

Радуйся, благоверному князю Василию о
рождении сына прорекий;

радуйся, благоверней княгине Софии скорое
и легкое от бремене разрешение у Господа
испросивый.

Радуйся, источниче благодатных утешений князем и всем, с верою притекающим к тебе;

радуйся, сподобивыйся сана игуменского чрез блаженнаго Святителя Иону.

Радуйся, яко последовал еси того учению и житию.

Радуйся, Иакове, богомудре отче наш.

Кондак 10

Спасти хотя душу твою, присноблаженне Иакове, всего себе Господу Богу предал еси, сущу ти zde, на земли, и в райских селениих со всеми святыми воспеваеши Ему: Аллилуиа.

Икос 10

Стена еси незыблема, и град убежища неборимый всем, с верою притекающим к заступлению твоему, и во всех нуждах в помощь ты призываем. Сего ради тебе, Преподобне отче наш Иакове, яко присному к Богу молитвеннику вопием:

радуйся, яко о всех просящих у тебе помощи и заступления ходатайствуеши пред Богом.

Радуйся, яко вся полезная и ко спасению потребная у Господа просиши;

радуйся, яко немощным и недужным
подаеши исцеления.

Радуйся, яко нечистыя духи от страждущих
человек отгоняеши;

радуйся, яко от всех бед и напастей нас
избавляеши.

Радуйся, яко скорбящим и унывающим
утешение подаеши;

радуйся, яко вдовицам и сирым покровитель
являеши.

Радуйся, яко обидимых и невинно гонимых
защищаеши;

радуйся, яко обитель твою своими молитвами
ограждаеши и сохраняеши.

Радуйся, яко духовная чада своя присно
посещаеши;

радуйся, яко и окрестныя веси твоим
предстательством от находящих зол невредимы
сохраняются.

Радуйся, твоим бо ходатайством от
губительных болезней избавляются.

Радуйся, Иакове, богомудре отче наш.

Кондак 11

Светозарный светильник явился еси, Преподобне Иакове, не точию в Костромских пределах, но и всей Российской земли; лучи бо чудес от цельбоносного образа твоего истекающие, достигают и дольних пределов. Темже прославляюще Прославльшаго тя Господа Бога, воспеваем Ему: Аллилуиа.

Икос 11

Предстоя Престолу Царя Славы вкупе с лики Ангельскими и всеми святыми, не презри присно, отче, моления нашего, и не забуди нас, вопющих ти сицевая:

радуйся, в теплейшей к Богу любви земное поприще твое скончавый.

Радуйся, в час кончины твоея Пресвятаго Тела и Пречестныя Крове приобщивыйся;

радуйся, в мире дух твой в руке Бога Отца предавый.

Радуйся, от земныя юдоли в Небесное Царствие преселивыйся;

радуйся, с лики Ангельскими на Небеси торжествуяй.

Радуйся, сонму Преподобных отец и постников сопричтенный;

радуйся, со всеми святыми неизреченного веселия наслаждайся.

Радуйся, от Ангелов с торжеством в радость Господа твоего введенный;

радуйся, венец Царствия от Христа, Царя Славы, по достоянию подвигов твоих приемый.

Радуйся, яко царствуеши на Небеси со Христом, Емуже сраспиался еси на земли;

радуйся, ублажаемый на земли.

Радуйся, прославляемый на Небеси.

Радуйся, Иакове, богомудре отче наш.

Кондак 12

Благодать Божия и доньне изливается от целебнаго образа твоего на всех, с верою и любовью приступающих к нему, и молитвенно в скорбех, в болезнях же и злых обстояниях ты призывающих, Богу же вопиющих: Аллилуиа.

Икос 12

Поем твоя подвиги, ублажаем равноангельное житие твое, почитаем память твою, дивный

угодниче Христов Иакове; от избытка сердца
вопием ти сице:

радуйся, постников похвало и утверждение.

Радуйся, монашествующих добрый пастырю
и наставниче;

радуйся, Костромских пределов украшение.

Радуйся, теплый и присный о нас ко Христу
Богу молитвенниче;

радуйся, сея страны светильниче пресветлый.

Радуйся, Божия благодати нам ходатаю;

радуйся, немощных врачу и недужных
целителю.

Радуйся, телес наших здоровья хранителю;

радуйся, душ наших на стезех спасения
руководителю.

Радуйся, всем православным христианом во
всех нуждах помощниче.

Радуйся, Иакове, богомудре отче наш.

Кондак 13

О, Преблаженне и Богомудре отче наш
Иакове, нынешнее наше приемши приношение,
умоли Господа Бога, о еже избавитися нам от

всякия скорби, бед и напастей, и смертоносных болезней, паче же вечных мук; Царствие же небесное со всеми святыми наследовати, да сподобимся выну с тобою воспевати: Аллилуиа.

Этот Кондак читается трижды. Затем Икос 1: «Ангел земный...», и Кондак 1: «Избранный чудотворче...».

Молитва 1

О, Преподобне и Богомудре отче наш Иакове! Ве мы, яко с лики Ангельскими и всеми святыми предстоиши присно Престолу Господа Вседержителя, и велие имаши к Нему дерзновение молитися о всех, с верою и умиленными слезами в помощь ты призывающих. Не премолчи убо, вопия за ны, недостойныя, ко Господу Богу, да отвратит гнев свой, праведно за беззакония наша на ны движимый, и да избавимся всяких скорбей, бед же и напастей, и злых обстояний, и благочестно поживем в будущем веце, ходяще в заповедех и оправданиих Господних непорочно. О, Преблаженне и Боголюбезне отче наш Иакове! Умоли Господа, да не оскудеют во обители твоей истинные ревнители иноческаго жития и подражатели святому и богоугодному житию

твоему; сохрани предстательством твоим к Богу обитель и страну сию от огня, глада, меча, нашествия иноплеменных и от всякаго зла, и всем, с верою и любовью притекающим во твою обитель испроси у Господа Бога грехов прощение, телесем здравие, исправление греховнаго жития и вечное спасение; да с тобою и всеми святыми сподобимся прославляти в Троице Славимаго Бога, Отца, и Сына и Святаго Духа, во веки веков. Аминь.

Молитва 2

Преподобне и богоносне отче наш Иакове! Приими ныне нас тебе усердно молящихся и припадающих ко всечестному и многоцелебному твоему гробу, идеже святое твое и многотрудное покоится тело, духом же на небесех предстоя Святей Троице со ангелы и преподобных отец лики; молися о чадах твоих, отче, да избавимся от всяких скорбей, болезней и обстояний, и благочестно проживем в настоящем житии, ходяще в заповедех и оправданиях Господних безпорочно, и да явимся последователи святому и равноангельному житию твоему. Ей, Преподобне отче, молим тя, испроси нам же и всем, верою к тебе притекающим грехов

прощение, телесем здравие, исправление жития и вечное спасение. Яко да твоим предстательством спасеннии, славу возсылати сподобимся в Троице славимому Богу, Отцу и Сыну и Святому Духу, ныне и присно и во веки веков. Аминь.

